

ମହା ମାତା



ଦ୍ଵିତୀୟ ଭାଗ

ରବୀନ୍ଦ୍ରନାଥ ଠାକୁର

দ্বিতীয় ভাগ
সহজ পাঠ

রবীন্দ্রনাথ ঠাকুর



বিশ্বভারতী গ্রন্থনবিভাগ
কলিকাতা

প্রকাশ বৈশাখ ১৩৩৭
পুনর্মুদ্রণ ১৩৩৭, ১৩৪০, ১৩৪৩, ১৩৪৪, ১৩৪৭
দ্বিতীয় সংস্করণ মাঘ ১৩৪৮
পুনর্মুদ্রণ ১৩৫০, ১৩৫১, ১৩৫৩, ১৩৫৪, ১৩৫৫, ১৩৫৬, ১৩৫৭, ১৩৫৮
১৩৬১, ১৩৬২, ১৩৬৩, ১৩৬৪, ১৩৬৫, ১৩৬৬, ১৩৬৭, ১৩৬৮, ১৩৬৯
১৩৭১, ১৩৭২, ১৩৭৪, ১৩৭৫, ১৩৭৬, ১৩৭৭
১৩৭৯, ১৩৮২, ১৩৮৭, ১৩৮৯
আশ্বিন ১৩৯২ : ১৯০৭ শক

নন্দলাল বসু-কর্তৃক চিত্রভূষিত

❶ বিশ্বভারতী

প্রকাশক শ্রীজগদ্বিন্দু ভৌমিক
বিশ্বভারতী। ৬ আচার্য জগদীশ বসু রোড। কলিকাতা ১৭
মুদ্রক শ্রীসৌরীন্দ্র দাশগুপ্ত
সান্ লিথোগ্রাফিং কোম্পানি
পি ২০ সি. আই. টি. রোড। কলিকাতা ১০

প্রকাশকের নিবেদন

যুক্তাক্ষরের সঙ্গে প্রথম পরিচয় বড়ো অক্ষরের মধ্যস্থতায় হওয়াই ভালো, কারণ তাতে জটিল অক্ষরগুলির গঠন চোখের সমুখে স্পষ্টভাবে থাকে। এ ছাড়া আবৃত্তির অভ্যাসও বড়ো অক্ষরের বই ধ'রেই করা উচিত। নইলে পরবর্তী বর্গে গিয়ে এ বিষয়ে শিশুদের নানা ক্রটি ঘটতে দেখা যায়।

এই দিকে লক্ষ রেখে, সহজ পাঠ দ্বিতীয় ভাগের বর্তমান সংস্করণে বইয়ের আকার ও অক্ষর বড়ো করা হল।

সমস্ত ছবিই শ্রীযুক্ত নন্দলাল বসু মহাশয়ের আঁকা। শিশুরা নিজে নিজে ছবিগুলি রঙ ক'রে নিতে পারবে ব'লে সেগুলি রেখায় আঁকা হয়েছে। এতে বই পড়ার সঙ্গে সঙ্গে শিশুরা ছবি আঁকার আনন্দও পাবে।

মাঘ ১৩৪৮

দ্বিতীয়-ভাগ সহজ পাঠের বর্তমান পুনর্মুদ্রণে রবীন্দ্র-পাণ্ডুলিপির সঙ্গে মিলিয়ে কয়েক ক্ষেত্রে পূর্বপাঠ সংশোধন করা হয়েছে।

ভাদ্র ১৩৬২

রবীন্দ্রনাথের মুদ্রিত রচনায় শব্দের প্রথমে ‘ে’ বসিয়ে সর্বদা একটি বিশেষ উচ্চারণ বোঝানো হয়ে থাকে। দেখো = দ্যাখো।
সেন = স্মান। বেলা = ব্যালা। ইত্যাদি।

ক’রে ব’লে হ’লে প্রভৃতি শব্দের উচ্চারণ যথাক্রমে : কোরে
বোলে হোলে। বিশেষ উচ্চারণ যেখানে সহজেই বুঝতে পারা যায়,
অনাবশ্যক-বোধে এই চিহ্ন ব্যবহার করা হয় নি।



প্রথম পাঠ

বাদল করেছে। মেঘের রঙ ঘন নীল। ঢং ঢং
ক'রে নটা বাজল। বংশু ছাতা মাথায় কোথায় যাবে?
ও যাবে সংসার-বাবুর বাসায়। সেখানে কংস-বধের
অভিনয় হবে। আজ মহারাজ হংসরাজ সিংহ আসবেন।
কংস-বধ অভিনয় তাঁকে দেখাবে। বাংলাদেশে তাঁর

সহজ পাঠ

বাড়ি নয়। তিনি পাংশুপুরের রাজা। সংসার-বাবু তাঁরি
সংসারে কাজ করেন। কাংলা, তুই বুঝি সংসার-বাবুর
বাসায় চলেছিস? সেখানে কংস-বধে সঙ সাজতে হবে।
কাংলা, তোর বুড়িতে কী? বুড়িতে আছে পালং শাক,
পিড়িং শাক, ট্যাংরা মাছ, চিংড়ি মাছ। সংসার-বাবুর মা
চেয়েছেন।





দ্বিতীয় পাঠ

আজ আচ্যনাথ-বাবুর কন্যার বিয়ে— তাঁর এই
শল্যপুরের বাড়িতে। কন্যার নাম শ্যামা। বরের নাম
বৈচ্যনাথ। বরের বাড়ি অহল্যাপাড়ায়। তিনি আর
তাঁর ভাই সৌম্য পাটের ব্যবসা করেন। তাঁর এক
ভাই ধৌম্যনাথ কলেজে পড়ে আর রম্যনাথ ইকুলে।

সহজ পাঠ

আত্মনাথ বড়ো ভালো লোক। দান-ধ্যান পুণ্য কাজে তাঁর মন। দেশের জন্ত অনেক কাজ করেন। সবাই বলে, তিনি ধন্য। আত্মনাথ-বাবু তাঁর ভৃত্য সত্যকে আমার কাছে পাঠিয়েছিলেন। আমি বলেছি, তাঁর কন্যার বিবাহে অবশ্য অবশ্য যাব। এখানে এসে দেখি, আঙিনায় বাজ বাজছে। চাষীরা এ বৎসর ভালো শস্য পেয়েছে। তাই তারা ভিড় ক'রে এসেছে। ভিতরে ঢুকি সাধ্য কী। অগত্যা বাইরে বসে আছি। দেখছি ছেলেরা খুশী হয়ে নৃত্য করছে। কেউ বা ব্যাটবল খেলছে। নিত্যশরণ ওদের ক্যাপ্টেন।





হাট

কুমোর-পাড়ার গোরুর গাড়ি—
বোঝাই-করা কলসি হাঁড়ি ।
গাড়ি চালায় বংশীবদন,
সঙ্গে-যে যায় ভাণ্ডে মদন ।
হাট বসেছে শুক্রবারে
বক্সীগঞ্জে পদ্মাপারে ।

সহজ পাঠ

জিনিসপত্র জুটিয়ে এনে
গ্রামের মানুষ বেচে কেনে ।
উচ্ছে বেগুন পটল মুলো,
বেতের বোনা ধামা কুলো,
সর্ষে ছোলা ময়দা আটা,
শীতের র্যাপার নক্সাকাটা,
ঝাঁঝরি কড়া বেড়ি হাতা,
শহর থেকে সস্তা ছাতা ।
কলসি ভরা এখো গুড়ে
মাছি যত বেড়ায় উড়ে ।
খড়ের আঁটি নৌকো বেয়ে
আনল ঘাটে চাষীর মেয়ে ।
অন্ধ কানাই পথের 'পরে
গান শুনিয়ে ভিক্ষে করে ।
পাড়ার ছেলে স্নানের ঘাটে
জল ছিটিয়ে সাঁতার কাটে ॥



তৃতীয় পাঠ


আজ মঙ্গলবার। পাড়ার জঙ্গল সাফ করবার দিন।
সব ছেলেরা দঙ্গল বেঁধে যাবে। রঙ্গলাল-বাবুও এখনি
আসবেন। আর আসবেন তাঁর দাদা বঙ্গ-বাবু। সিঙ্গি,
তুমি দৌড়ে যাও তো। অনঙ্গদাদাকে ধরো, মোটর-
গাড়িতে তাঁদের আনবেন। সঙ্গে নিতে হবে কুড়ুল,

সহজ পাঠ

কোদাল, ঝাঁটা, বুড়ি। আর নেব ভিজি মেথরকে।
এবার পঙ্কপাল এসে বড়ো ক্ষতি করেছে। ক্ষতিবাবুর
ক্ষেতে একটি ঘাস নেই। অক্ষয়-বাবুর বাগানে কপির



পাতাগুলো খেয়ে সাজ ক'রে দিয়েছে। পঙ্কপাল না
তাড়াতে পারলে এবার কাজে ভঙ্গ দিতে হবে।
ঈশান-বাবু ইঙ্গিতে বলেছেন, তিনি কিছু দান করবেন।





চতুর্থ পাঠ

চন্দননগর থেকে আনন্দ-বাবু আসবেন। তিনি আমার পাড়ার কাজ দেখতে চান। দেখো, যেন নিন্দা না হয়। ইন্দুকে ব'লে দিয়ো, তাঁর আতিথেয় যেন খুঁত না থাকে। তাঁর ঘরে সুন্দর দেখে ফুলদানি রেখো। তাতে কুন্দফুল থাকবে আর আকন্দ থাকবে। রজ্জু

সহজ পাঠ

বেহারাকে বোলো, তাঁর শোবার ঘরে তাঁর তোরঙ্গ যেন
রাখে। ঘর বন্ধ যেন না থাকে। সন্ধ্যা হ'লে ঘরে
ধুনোর গন্ধ দিয়ে। দীনবন্ধুকে রেখো পাশের ঘরেই।
তাঁদের সঙ্গে সিন্ধু-বাবু আসবেন, তাঁকে অগ্র ঘরে
রাখতে হবে। বিন্দুকে ব'লে মালাচন্দন তৈরী রাখা
চাই। বন্দেমাতরম্ গান নন্দী জানে তো? সেই অন্ধ
গায়ককেও ডেকে এনো। সে তো মন্দ গায় না।






পঞ্চম পাঠ

বর্ষা নেমেছে। গর্ষি আর নেই। থেকে থেকে
মেঘের গর্জন আর বিদ্যুতের চমকানি চলছে। শিলং
পর্বতে ঝরনার জল বেড়ে উঠল। কর্ণফুলি নদীতে বন্যা
দেখা দিয়েছে। সর্ষেক্ষেত ডুবিয়ে দিলে। দুর্গানাথের
আঙিনায় জল উঠেছে। তার দরবার বেড়া ভেঙে গেল।

সহজ পাঠ

বেচার। গোরুগুলোর বড়ো দুর্গতি। এক-হাঁটু পাঁকে
দাঁড়িয়ে আছে। চাষীদের কাজকর্ম সব বন্ধ। ঘরে ঘরে
সর্দি-কাশি। কর্তাবাবু বরষাতি প'রে চলেছেন। সঙ্গে তাঁর
আদালি তুর্কি মিঞা। গর্ত সব ভ'রে গিয়ে ব্যাঙের
বাসা হ'ল। পাড়ার নর্দমাগুলো জলে ছাপিয়ে গেছে।

ঐখানে মা পুকুর-পাড়ে
জিয়ল গাছের বেড়ার ধারে
হোথায় হব বনবাসী,
কেউ কোথাও নেই।
ঐখানে ঝাড়তলা জুড়ে
বাঁধব তোমার ছোট্ট কুঁড়ে,
শুকনো পাতা বিছিয়ে ঘরে
থাকব দুজনেই।
বাঘ ভাল্লুক অনেক আছে—
আসবে না কেউ তোমার কাছে,




দিনরাতির কোমর বেঁধে
থাকব পাহারাতে ।
রাক্ষসেরা ঝোপে-ঝাড়ে
মারবে উঁকি আড়ে আড়ে,
দেখবে আমি দাঁড়িয়ে আছি
ধনুক নিয়ে হাতে ।

সহজ পাঠ
আঁচলেতে খই নিয়ে তুই
যেই দাঁড়াবি দ্বারে
অমনি যত বনের হরিণ
আসবে সারে সারে ।
শিংগুলি সব আঁকাবাঁকা,
গায়েতে দাগ চাকা চাকা,
লুটিয়ে তারা পড়বে ভুঁয়ে
পায়ের কাছে এসে ।
ওরা সবাই আমায় বোঝে,
করবে না ভয় একটুও যে,
হাত বুলিয়ে দেব গায়ে,
বসবে কাছে ঘেঁষে ।
ফলসাবনে গাছে গাছে
ফল ধ'রে মেঘ ঘনিয়ে আছে,
ঐখানেতে ময়ূর এসে
নাচ দেখিয়ে যাবে ।


দ্বিতীয় ভাগ
শালিখরা সব মিছিমিছি
লাগিয়ে দেবে কিচিমিচি,
কাঠবেড়ালি লেজটি তুলে
হাত থেকে ধান খাবে ।

ষষ্ঠ পাঠ

উষ্মি নদীর বরুনা দেখতে যাব । দিনটা বড়ো বিক্রী ।
শুনছ বজ্রের শব্দ ? শ্রাবণ মাসের বাদলা । উষ্মিতে
বান নেমেছে । জলের স্রোত বড়ো ছরন্ত । অবিশ্রান্ত
ছুটে চলেছে । অনন্ত, এসো একসঙ্গে যাত্রা করা যাক ।
আমাদের দু-দিন মাত্র ছুটি । কলেজের ছাত্রেরা গেছে
ত্রিবেণী, কেউ-বা গেছে আত্রাই । সাঁত্রাগাছির কান্তি
মিত্র যাবে আমাদের সঙ্গে উষ্মির বরুনায় । শান্তা কি যেতে
পারবে ? সে হয়তো শ্রান্ত হয়ে পড়বে । পথে যদি জল



নামে মিশ্রদের বাড়ি আশ্রয় নেব। সঙ্গে খাবার আছে
তো? সন্দেশ আছে, পান্তোয়া আছে, বোঁদে আছে।
আমাদের কান্ত চাকর শীঘ্র কিছু খেয়ে নিক। তার
খাবার আগ্রহ দেখি নে। সে ভোরের বেলায় পান্তা ভাত
খেয়ে বেরিয়েছে। তার বোন ক্ষান্তমণি তাকে খাইয়ে
দিলে।



সপ্তম পাঠ

শ্রীশকে বোলো, তার শরীর যদি সুস্থ থাকে সে যেন বসন্তের দোকানে যায়। সেখান থেকে খাস্তা কচুরি আনা চাই। আর কিছু পেস্তা বাদাম কিনে আনতে হবে। দোকানের রাস্তা সে জানে তো? বাজারে একটা আস্ত কাৎলা মাছ যদি পায়, নিয়ে আসে যেন। আর বস্তা থেকে গুন্ডি ক'রে ত্রিশটা আলু আনা চাই। এবার

সহজ পাঠ

আলু খুব সস্তা। একান্ত যদি না পাওয়া যায়, কিছু
ওল আনিয়ে নিয়ো। রাস্তায় রৈঁধে খেতে হবে, তার
ব্যবস্থা করা দরকার। মনে রেখো— কড়া চাই, খুস্তি
চাই; জলের পাত্র একটা নিয়ো। অত ব্যস্ত হয়েছ
কেন? আন্তে আন্তে চলো। ক্লান্ত হয়ে পড়বে যে।

আমি যে রোজ সকাল হ'লে

যাই শহরের দিকে চ'লে

তমিজ মিঞার গোরুর গাড়ি চ'ড়ে ;

সকাল থেকে সারা দুপুর

ইট সাজিয়ে ইটের উপর

খেয়াল-মতো দেয়াল তুলি গ'ড়ে।

সমস্ত দিন ছাত-পিটুনি

গান গেয়ে ছাত পিটোয় শুনি,

অনেক নীচে চলছে গাড়ি ঘোড়া।




বাসনওয়ালা থালা বাজায় ;
স্বর ক'রে ঐ হাঁক দিয়ে যায়
আতাওয়ালা নিয়ে ফলের ঝোড়া ।
সাড়ে চারটে বেজে ওঠে,
ছেলেরা সব বাসায় ছোট্টে
হো হো ক'রে উড়িয়ে দিয়ে ধুলো ।

সহজ পাঠ

রোদুহর যেই আসে প'ড়ে
পুবের মুখে কোথা ওড়ে
দলে দলে ডাক দিয়ে কাকগুলো ।
আমি তখন দিনের শেষে
ভারার থেকে নেমে এসে
আবার ফিরে আসি আপন গাঁয়ে—
জানো না কি আমার পাড়া
যেখানে ওই খুঁটি গাড়া
পুকুর-পাড়ে গাজন-তলার বাঁয়ে ॥

অষ্টম পাঠ

আর্ম্যানি গির্জের কাছে আপিস। যাওয়া মুশকিল
হবে। পূর্ব দিকের মেঘ ইম্পাতের মতো কালো। পশ্চিম
দিকের মেঘ ঘন নীল। সকালে রোদ্দ ছিল, নিশ্চিন্ত
ছিলাম। দেখতে দেখতে বিস্তর মেঘ জমেছে। বাদলা



বেশিক্ষণ স্থায়ী না হ'লে বাঁচি। শরীরটা অসুস্থ আছে।
মাথা ধরেছে, স্থির হয়ে থাকতে পারছি নে। আপিসের
ভাত এখনো হ'ল না। উনানের আগুনটা উদুকিয়ে
দাও। ঠাকুর আমার বোলে যেন লক্ষা না দেয়।
বন্ধিমকে আমার অঙ্কের খাতাটা আনতে বোলো,
দোতলা ঘরের পালঙ্কের উপর আছে। কঙ্কা খাতা নিয়ে
খেলতে গিয়ে তার পাতা ছিঁড়ে দিয়েছে।



নবম পাঠ

স্মৃতি নামল দেখছি। স্মৃতিধর, ছাতাটা খুঁজে নিয়ে
আয় ; না পেলে ভারি কষ্ট হবে। কেউ, শিষ্ট শান্ত হয়ে
ঘরে ব'সে থাকে। দুর্ঘটনা কোরো না। স্মৃতিতে ভিজলে
অসুখ করবে। সঞ্জীবকে ব'লে দেব, তোমার জন্মে
মিষ্টি লজ্জুস এনে দেবে। কাল যে তোমাকে খেলার

দ্বিতীয় ভাগ

খঞ্জনী দিলাম, সেটা হারিয়েছ বুঝি? ও বাড়ি থেকে
রঞ্জনকে ডেকে দেব, সে তোমার সঙ্গে খেলা করবে।
কাঞ্জিলাল, ব্যাঙগুলো ঘরের মধ্যে আসে যে, ঘর নষ্ট
করবে। ওরে তুষ্টু, ওদের তাড়িয়ে দে। ঘন মেঘে
সব অস্পষ্ট হয়ে এল। আর দৃষ্টি চলে না। বোর্ফমী
গান গাইতে এসেছে। ওকে নিষ্ঠুর হয়ে বাইরে রেখো
না। স্বর্গিতে ভিজে যাবে, কষ্ট পাবে।

সেদিন ভোরে দেখি উঠে
স্বর্গি বাদল গেছে ছুটে,
রোদ উঠেছে ঝিলমিলিয়ে
বাঁশের ডালে ডালে।
ছুটির দিনে কেমন সুরে
পুজোর সানাই বাজায় দূরে,



তিনটে শালিক ঝগড়া করে
রান্নাঘরের চালে ।
শীতের বেলায় দুই পহরে
দূরে কাদের ছাদের 'পরে
ছোট্ট মেয়ে রোদুছরে দেয়
বেগনি রঙের শাড়ি ।

দ্বিতীয় ভাগ

চেয়ে চেয়ে চূপ করে রই—

তেপান্তরের পার বুঝি ওই,

মনে ভাবি ঐখানেতেই

আছে রাজার বাড়ি ।

থাকত যদি মেঘে-ওড়া

পক্ষিরাজের বাচ্ছা ঘোড়া

তক্ষনি যে যেতেম তারে


লাগাম দিয়ে ক'ষে ;

যেতে যেতে নদীর তীরে

ব্যাক্সমা আর ব্যাক্সমীরে

পথ শুধিয়ে নিতেম আমি

গাছের তলায় ব'সে ॥



দশম পাঠ

এত রাত্রে দরজায় ধাক্কা দিচ্ছে কে? কেউ না, বাতাস ধাক্কা দিচ্ছে। এখন অনেক রাত্রি। উল্লাপাড়ার মাঠে শেয়াল ডাকছে—হুকাহুয়া। রাস্তায় ও কি একা-গাড়ির শব্দ? না, মেঘ গুরু গুরু করছে। উল্লাস, তুমি যাও তো, কুকুরের বাচ্ছাটা বড়ো চেষ্টাচ্ছে, ঘুমতে দিচ্ছে না, ওকে শান্ত ক'রে এসো। ওটা কিসের ডাক উল্লাস? অশ্বখ গাছে পেঁচার ডাক। উচ্ছের ক্ষেত থেকে বিল্লি ঐ বিঁবিঁ করছে। দরজার পাল্লাটা বাতাসে ধড়াস

দ্বিতীয় ভাগ

ধড়াস করে পড়ছে, বন্ধ ক'রে দাও। ওটা কি কান্নার শব্দ। না, রান্নাঘর থেকে বিড়াল ডাকছে। যাও-না



উল্লাস, থামিয়ে দিয়ে এসো গে। আমার ভয় করছে। বড়ো অন্ধকার। ভজ্জুকে ডেকে দিই। ছি ছি উল্লাস, ভয় করতে লজ্জা করে না? আচ্ছা, আমি নিজে যাচ্ছি। আর তো রাত নেই। পূব দিক উজ্জ্বল হয়েছে। ও ঘরে বিছানায় খুকি চঞ্চল হয়ে উঠল। বাগ্গাকে ধাক্কা দিয়ে জাগিয়ে দাও। বাগ্গা শীঘ্র আমার জন্তে চা আনুক আর কিঞ্চিৎ বিস্কুট। আমি ততক্ষণ মুখ ধুয়ে আসি। রন্ধনামনি থাক্ খুকুর কাছে। তুমিও সাজসজ্জা ক'রে তৈরী থাকো উল্লাস। বেড়াতে যাব। উত্তম কথা। কিন্তু ঘাস ভিজে কেন? এক পতন রফিট হয়ে গেল বুঝি?

সহজ পাঠ

এবার লণ্ঠনটা নিবিয়ে দাও। আর মণ্টুকে বলো,
বারান্দা পরিষ্কার ক'রে দিক। এখনি রেভারেণ্ড
এণ্ডার্সন আসবেন। পণ্ডিত-মশায়েরও আসবার সময়
হ'ল। ঐ শোনো, কুণ্ডদের বাড়ি ঢং ঢং ক'রে ছটার
ঘণ্টা বাজে।

—

আকাশ-পারে পুবের কোণে
কখন যেন অগ্ন্যম্নে
ফাঁক ধরে ঐ মেঘে,
মুখের চাদর সরিয়ে ফেলে
বন্ধ চোখের পাতা মেলে
আকাশ ওঠে জেগে।
ছিঁড়ে-যাওয়া মেঘের থেকে
পুকুরে রোদ পড়ে বেঁকে,
লাগায় ঝিলিমিলি।



বাঁশ-বাগানের মাথায় মাথায়
তেঁতুল গাছের পাতায় পাতায়
হাসায় খিলিখিলি ।
হঠাৎ কিসের মন্ত্র এসে
ভুলিয়ে দিলে এক নিমেষে
বাদল-বেলার কথা ।
হারিয়ে-পাওয়া আলোটিরে
নাচায় ডালে ফিরে ফিরে
ঝুম্‌কো ফুলের লতা ॥



একাদশ পাঠ

ভক্তরামের নৌকো শক্ত কাঠের তক্তা দিয়ে
তৈরী। ভক্তরাম সেই নৌকো সস্তা দামে বিক্রি করে।
শক্তিনাথ-বাবু কিনে নেন। শক্তিনাথ আর মুক্তিনাথ দুই
ভাই। যে পাড়ায় থাকেন তার নাম জেলেবস্তি। তাঁর বাড়ি
খুব মস্ত। সামনে নদী, পিছনে বড়ো রাস্তা। তাঁর দারোয়ান
শক্তু সিং আর আক্রম মিশ্র রোজ সকালে কুস্তি করে।

দ্বিতীয় ভাগ

শক্তিনাথ-বাবুর চাকরের নাম অক্রুর । তাঁর বড়ো ছেলের নাম বিক্রম । ছোটো ছেলের নাম শক্রনাথ । শক্তিবাবু তাঁর নৌকো লাল রঙ ক'রে নিলেন । তার নাম দিলেন রক্তজবা । তিনি মাঝে মাঝে নৌকোয় ক'রে কখনো তিস্তা নদীতে, কখনো আত্রাই নদীতে, কখনো ইচ্ছামতীতে বেড়াতে যান । একদিন অস্রান মাসে পত্র পেলেন, বিপ্রগ্রামে বাঘ এসেছে । শিকারে যাত্রা করলেন । সেদিন শুক্রবার । শুক্রপক্ষের চন্দ্র সবে অস্ত গেছে । আক্রম বন্দুক নিয়ে চলল । আর দুটো বল্লম ছিল । সিঁদুকে ছিল গুলি বারুদ । নদীতে প্রবল স্রোত । বেলা যখন দুই প্রহর, নৌকো নন্দগ্রামে পৌঁছল । রোদ্দু বাঁ বাঁ করছে । এক ভদ্রলোক খবর দিলেন, কাছেই বন্দীপুরের বন, সেখানে আছে বাঘ ।

শক্তিবাবু আর আক্রম বাঘ খুঁজতে নামলেন । জঙ্গল ঘন হয়ে এল । ঘোর অন্ধকার । কিছু দূরে গিয়ে দেখেন, এক পোড়ো মন্দির । জনপ্রাণী নেই । শক্তিবাবু

সহজ পাঠ

বললেন, এইখানে একটু বিশ্রাম করি। সঙ্গে ছিল লুচি, আলুর দম আর পাঁঠার মাংস। তাই খেলেন। আক্রম খেল চাটনি দিয়ে রুটি। তখন বেলা পড়ে আসছে। গাছের ফাঁক দিয়ে বাঁকা হয়ে রোদ্দ পড়ে। প্রকাণ্ড অর্জুন গাছের উপর কতকগুলো বাঁদর; তাদের লম্বা লেজ ঝুলছে। শক্তিবাবু কিছু দূর গিয়ে দেখলেন, একটা ছোটো সোঁতা। তাতে এক-হাঁটুর বেশি জল হবে না। তার ধারে বালি। সেই বালির উপর বড়ো বড়ো খাবার দাগ। নিশ্চয় বাঘের খাবা। শক্তিবাবু ভাবতে লাগলেন, কী করা কর্তব্য। অম্মান মাসের বেলা। পশ্চিমে সূর্য অস্ত গেল। সন্ধ্যা হ'তেই ঘোর অন্ধকার। কাছে তেঁতুল গাছ। তার উপরে দুজনে চড়ে বসলেন। গাছের গুঁড়ির সঙ্গে চাদর দিয়ে নিজেদের বাঁধলেন, পাছে ঘুম এলে প'ড়ে যান। কোথাও আলো নেই। তারা দেখা যায় না। কেবল অসংখ্য জোনাকি গাছে গাছে জ্বলছে।

দ্বিতীয় ভাগ

শক্তিবাবুর একটু নিদ্রা এসেছে, এমন সময় হঠাৎ ধপ্ ক'রে একটা শব্দ হওয়াতে চমকে জেগে উঠলেন। দেখলেন, কখন বাঁধন আলুগা হয়ে আক্রমণ নীচে প'ড়ে গেছে। শক্তিনাথ তাকে দেখতে তাড়াতাড়ি নেমে




এলেন। হঠাৎ দেখেন, কাছেই অন্ধকারে দুটো চোখ জ্বল্ জ্বল্ করছে। কী সর্বনাশ! এ তো বাঘের চোখ। বন্দুক তোলবার সময় নেই। ভাগ্যে দুজনের কাছে দুটো বিজলি বাতির মশাল ছিল। সে দুটো যেমনি হঠাৎ জ্বালানো, অমনি বাঘ ভয়ে দৌড় দিলে। সে রাত্রি আবার দুজনের গাছে কাটল।

সহজ পাঠ

পরের দিন সকাল হ'ল। কিন্তু জঙ্গলের মধ্যে রাস্তা মেলে না, যতই চলে জঙ্গল বেড়ে যায়। গায়ে কাঁটার আঁচড় লাগে। রক্ত পড়ে। খিদে পেয়েছে। তেষ্টা পেয়েছে। এমন সময় মানুষের গলার শব্দ শোনা গেল। এক দল কাঠুরিয়া কাঠ কাটতে চলেছে। শক্তিবাবু বললেন, “তোমাদের ঘরে নিয়ে চলো। রাস্তা ভুলেছি। কিছু খেতে দাও।” নদীর ধারে একটা টিবির 'পরে তাদের কুঁড়েঘর। গোলপাতা দিয়ে ছাওয়া। কাছে একটা মস্ত বট গাছ। তার ডাল থেকে লম্বা লম্বা ঝুরি নেমেছে। সেই গাছে যত রাজ্যের পাখির বাসা।

কাঠুরিয়ারা শক্তিবাবুকে আক্রমকে যত্ন ক'রে খেতে দিলে। তালপাতার ঠোঙায় এনে দিলে চিঁড়ে আর বনের মধু। আর দিলে ছাগলের দুধ। নদী থেকে ভাঁড়ে করে এনে দিলে জল।

রাত্রে ভালো ঘুম হয় নি। শরীর ছিল ক্লান্ত। শক্তিবাবু



দ্বিতীয় ভাগ

বটের ছায়ায় শুয়ে ঘুমোলেন। বেলা যখন চার
প্রহর তখন কাঠুরিয়াদের সর্দার পথ দেখিয়ে নৌকোর
তাদের পৌঁছিয়ে দিলে। শক্তিবাবু দশ টাকার নোট বের
ক'রে বললেন, “বড়ো উপকার করেছ, বক্শিশ লও।”

সর্দার হাত জোড় ক'রে বললে, “মাপ করবেন, টাকা
নিতে পারব না, নিলে অধর্ম হবে।” এই বলে নমস্কার
ক'রে সর্দার চলে গেল।

—

একদিন রাতে আমি স্বপ্ন দেখি—

“চেয়ে দেখো” “চেয়ে দেখো” বলে যেন বিহু।

চেয়ে দেখি, ঠোকাঠুকি বরগা-কড়িতে,

কলিকাতা চলিয়াছে নড়িতে নড়িতে।

ইটে-গড়া গণ্ডার বাড়িগুলো সোজা

চলিয়াছে, দুদাড় জানালা দরোজা।

রাস্তা চলেছে যত অজগর সাপ,

পিঠে তার ট্রামগাড়ি পড়ে ধুপ্-ধাপ্।

সহজ পাঠ

দোকান বাজার সব নামে আর উঠে,
ছাদের গায়েতে ছাদ মরে মাথা কুটে ।
হাওড়ার ব্রিজ চলে মস্ত সে বিছে,
হারিসন রোড চলে তার পিছে পিছে ।
মহুমেন্টের দোল, যেন খাপা হাতি
শূন্যে ছুলায়ে শুঁড় উঠিয়াছে মাতি ।
আমাদের ইস্কুল ছোট্টে হন্ হন্,
অঙ্কের বই ছোট্টে, ছোট্টে ব্যাকরণ ।
ম্যাপগুলো দেয়ালেতে করে ছট্‌ফট্‌,
পাখি যেন মারিতেছে পাখার ঝাপট ।
ঘণ্টা কেবলি দোলে, ঢঙ্ ঢঙ্ বাজে—
যত কেন বেলা হোক তবু থামে না যে ।
লক্ষ লক্ষ লোক বলে, “থামো থামো,
কোথা হতে কোথা যাবে, একি পাগলামো !”
কলিকাতা শোনে নাকো চলার খেলালে ;
নৃত্যের নেশা তার স্তম্ভে দেয়ালে ।

দ্বিতীয় ভাগ

আমি মনে মনে ভাবি, চিন্তা তো নাই,
কলিকাতা যাক নাকো সোজা বোম্বাই ।
দিল্লী লাহোরে যাক, যাক না আগ্রা—
মাথায় পাগ্‌ড়ি দেব পায়েতে নাগ্‌রা ।
কিন্ধা সে যদি আজ বিলাতেই ছোটো
ইংরেজ হবে সবে বুট-হ্যাট-কোটো ।
কিসের শব্দে ঘুম ভেঙে গেল যেই—
দেখি, কলিকাতা আছে কলিকাতাতেই ।

দ্বাদশ পাঠ

গুপ্তিপাড়ার বিশ্বম্ভর-বাবু পাল্কি চ'ড়ে চলেছেন
সপ্তগ্রাম । ফাল্গুন মাস । কিন্তু এখনো খুব ঠাণ্ডা । কিছু
আগে প্রায় সপ্তাহ ধ'রে রষ্টি হয়ে গেছে । বিশ্বম্ভর-বাবুর
গায়ে এক মোটা কব্বল । পাল্কির সঙ্গে চলেছে তার শম্ভু
চাকর, হাতে এক লম্বা লাঠি । পাল্কির ছাদে ওষুধের

সহজ পাঠ

বাক্স, দড়ি দিয়ে বাঁধা। শম্ভুর গায়ে অদ্ভুত জোর। এক-
বার কুস্তীরার জঙ্গলে তাকে ভল্লুকে ধরেছিল। সঙ্গে
বন্দুক ছিল না। শুদ্ধ কেবল লাঠি নিয়ে ভল্লুকের সঙ্গে
তার যুদ্ধ হ'ল। শম্ভুর হাতের লাঠি খেয়ে ভল্লুকের
মেরুদণ্ড গেল ভেঙে। তার আর উত্থানশক্তি রইল না।
আর একবার শম্ভু বিশ্বম্ভুর-বাবুর সঙ্গে গিয়েছিল স্বর্ণগঞ্জে।
সেখানে পদ্মানদীর চরে রান্না চড়াতে হবে। তখন গ্রীষ্ম-
কালের মধ্যাহ্ন। পদ্মার ধারে ছোটো ছোটো ঝাড় গাছের
জঙ্গল। উমান ধরানো চাই। দা দিয়ে শম্ভু ঝাড়ডাল
কেটে আঁটি বাঁধল। অসহ্য রৌদ্র। বড়ো তৃষ্ণা পেয়েছে।
নদীতে শম্ভু জল খেতে গেল। এমন সময় দেখলে, একটা
বাহুরকে ধরেছে কুমীরে। শম্ভু এক লম্ফে জলে প'ড়ে
কুমীরের পিঠে চ'ড়ে বসল। দা দিয়ে তার গলায় পোঁচ
দিতে লাগল। জল লাল হয়ে উঠল রক্তে। কুমীর যন্ত্রণায়
বাহুরকে দিল ছেড়ে। শম্ভু সাঁতার দিয়ে ডাঙায় উঠে এল।

বিশ্বম্ভুর-বাবু ডাক্তার। রোগী দেখতে চলেছেন বহু

দ্বিতীয় ভাগ

দূরে। সেখানে ইস্টিমার-ঘাটের ইস্টেশন-মাস্টার মধু বিশ্বাস। তাঁর ছোটো ছেলের অল্পশূল, বড়ো কন্ড পাচ্ছে।



বিষ্ণুপুরের পশ্চিম ধারের মাঠ প্রকাণ্ড। সেখানে যখন পাল্কি এল তখন সন্ধ্যা হয়ে এসেছে। রাখাল গোরু নিয়ে চলেছে গোষ্ঠে ফিরে। বিশ্বম্ভর-বাবু তাকে ডেকে জিজ্ঞাসা করলেন, “ওহে বাপু, সপ্তগ্রাম কত দূরে বলতে পার?”

সহজ পাঠ

রাখাল বললে, “আজ্ঞে, সে তো সাত ক্রোশ হবে। আজ সেখানে যাবেন না। পথে ভীষ্মহাটের মাঠ, তার কাছে শ্মশান। সেখানে ডাকাতের ভয়।”

ডাক্তার বললেন, “বাবা, রোগী কষ্ট পাচ্ছে, আমাকে যেতেই হবে।”

তিপ্পনি খালের ধারে যখন পাল্কি এল রাত্রি তখন দশটা। বাঁধন আলগা হয়ে পাল্কির ছাদ থেকে ডাক্তারের বাক্সটা গেল পড়ে। ক্যাস্টর অয়েলের শিশি ভেঙে চূর্ণ হয়ে গেল। বাক্সটা তো ফের শক্ত ক’রে বাঁধলে। কিন্তু আবার বিপদ। খাল পেরিয়ে আন্দাজ দু ক্রোশ পথ গেছে, এমন সময় মড়্ মড়্ ক’রে ডাঙা গেল ভেঙে, পাল্কিটা পড়ল মাটিতে। পাল্কি হালকা কাঠে তৈরী ; বিশ্বস্তর-বাবুর দেহটি স্থূল।

আর উপায় নেই, এইখানেই রাত্রি কাটাতে হবে। ডাক্তার-বাবু ঘাসের উপর কয়ল পাতলেন, লণ্ঠনটি রাখলেন কাছে। শত্ৰুকে নিয়ে গম্প করতে লাগলেন।

দ্বিতীয় ভাগ

এমন সময় বেহারাদের সর্দার বুদ্ধু এসে বললে, “ঐ-যে কারা আসছে, ওরা ডাকাত সন্দেহ নেই।”

বিশ্বম্ভর-বারু বললেন, “ভয় কী, তোরা তো সবাই আছিস।” বুদ্ধু বললে, “বস্তু পালিয়েছে, পল্লুকেও দেখছি নে। বক্সি লুকিয়েছে ঐ ঝোপের মধ্যে। ভয়ে বিষ্ণুর হাত-পা আড়ম্ব।”

শুনে ডাক্তার তো ভয়ে কম্পিত। ডাকলেন, “শম্ভু।” শম্ভু বললে, “আজ্ঞে।”

ডাক্তার বললেন, “এখন উপায় কী?”

শম্ভু বললে, “ভয় নেই, আমি আছি।”

ডাক্তার বললেন, “ওরা যে পাঁচজন।”

শম্ভু বললে, “আমি যে শম্ভু।” এই ব’লে উঠে দাঁড়িয়ে এক লম্ফ দিলে, গর্জন ক’রে বললে, “খবদার।”

ডাকাতেরা অটুহাস্য ক’রে এগিয়ে আসতে লাগল। তখন শম্ভু পাল্কির সেই ভাঙা ডাঙাখানা তুলে নিয়ে ওদের দিকে ছুঁড়ে মারলে। তারি এক ঘায়ে তিনজন



একসঙ্গে পড়ে গেল। তার পরে শম্ভু লাঠি ঘুরিয়ে যেই
ওদের মধ্যে বাঁপিয়ে পড়ল বাকি দুজনে দিল দৌড়।


তখন ডাক্তার-বাবু ডাকলেন, “শম্ভু।”

শম্ভু বললে, “আজ্ঞে।”

বিশ্বম্ভর-বাবু বললেন, “এইবার বাক্সটা বের করো।”


শম্ভু বললে, “কেন, বাক্স নিয়ে কী হবে?”

ডাক্তার বললেন, “ঐ তিনটে লোকের ডাক্তারি করা
চাই। ব্যাণ্ডেজ বাঁধতে হবে।”



রাত্রি তখন অম্পই বাকি। বিশ্বস্তর-বাবু আর শম্ভু
দুজনে মিলে তিনজনের শুশ্রূষা করলেন।

সকাল হয়েছে। ছিন্ন মেঘের মধ্য দিয়ে সূর্যের রশ্মি
ফেটে পড়ছে। একে একে সব বেহারা ফিরে আসে।
বস্তু এল, পল্লু এল, বক্সির হাত ধরে এল বিষ্ণু, তখনো
তার হৃৎপিণ্ড কম্পমান।




সিঁমার আসিছে ঘাটে, প'ড়ে আসে বেলা—
পূজার ছুটির দল, লোকজন মেলা
এল দূর দেশ হতে ; বৎসরের পরে
ফিরে আসে যে যাহার আপনার ঘরে ।
জাহাজের ছাদে ভিড় ; নানা লোকে নানা
মাদুরে কয়লে লেপে পেতেছে বিছানা
ঠেসাঠেসি ক'রে । তারি মাঝে হরেরাম
মাথা নেড়ে বাজাইছে হারমোনিয়াম ।
বোঝা আছে কত শত, বাক্স কত রূপ,
টিন বেত চামড়ার পুঁটুলির স্তূপ,



থলি ঝুলি ক্যান্ডিশের, ডালা ঝুড়ি ধামা
সবজিতে ভরা। গায়ে রেশমের জামা,
কোমরে চাদর বাঁধা, চণ্ডী অবিনাশ
কলিকাতা হতে আসে, বঙ্কু শ্যামদাস
অম্বিকা অক্ষয় ; নতুন চীনের জুতা
করে মম্‌মস্, মেরে কনুইয়ের গুঁতা
ভিড় ঠেলে আগে চলে ; হাতে বাঁধা ঘড়ি
চোখেতে চশমা কারো, সরু এক ছড়ি

সহজ পাঠ

সবেগে ছুলায় । ঘন ঘন ডাক ছাড়ে
স্টিমারের বাঁশি ; কে পড়ে কাহার ঘাড়ে ।
সবাই সবার আগে যেতে চায় চ'লে—
ঠেলাঠেলি, বকাবকি । শিশু মার কোলে
চীৎকার-স্বরে কাঁদে । গড়্ গড়্ ক'রে
নোঙর ডুবিল জলে ; শিকলের ডোরে
জাহাজ পড়িল বাঁধা ; সিঁড়ি গেল নেমে,
এঞ্জিনের ধক্ধকি সব গেল থেমে ।
“কুলি কুলি” ডাক পড়ে ; ডাঙা হতে যুটে
ছুড়দাড়্ ক'রে এল দলে দলে ছুটে ।
তীরে বাজাইয়া হাঁড়ি গাহিছে ভজন
অন্ধ বেণী । যাত্রীদের আত্মীয় স্বজন
অপেক্ষা করিয়া আছে ; নাম ধ'রে ডাকে,
খুঁজে খুঁজে বের করে যে চায় যাহাকে ।
চলিল গোরুর গাড়ি, চলে পাল্কি ডুলি,
শ্যাকরা-গাড়ির ঘোড়া উড়াইল ধুলি ।



সূর্য গেল অস্তাচলে ; আধার ঘনালো ;
হেথা হোথা কেরোসিন লণ্ঠনের আলো
ছুলিতে ছুলিতে যায়, তার পিছে পিছে
মাথায় বোঝাই নিয়ে মুটেরা চলিছে ।
শূন্য হয়ে গেল তীর । আকাশের কোণে
পঞ্চমীর চাঁদ ওঠে । দূরে বাঁশবনে
শেয়াল উঠিল ডেকে । মুদির দোকানে
টিম্ টিম্ ক'রে দীপ জ্বলে একখানে ॥

সহজ পাঠ


ত্রয়োদশ পাঠ

উদ্ধব মণ্ডল জাতিতে সদগোপ। তার অত্যন্ত দরিদ্র অবস্থা। ভূসম্পত্তি যা-কিছু ছিল ঋণের দায়ে বিক্রয় হয়ে গেছে। এখন মজুরি ক'রে কায়ক্লেশে তার দিনপাত হয়।

এ দিকে তার কন্যা নিস্তারিণীর বিবাহ। বরের নাম বটকৃষ্ণ। তার অবস্থা মন্দ নয়। ক্ষেতের উৎপন্ন শস্য দিয়ে সহজেই সংসার-নির্বাহ হয়। বাড়িতে পূজা-অর্চনা ক্রিয়াকর্মও আছে।

আগামী কাল উনিশে জ্যৈষ্ঠ বিবাহের দিন। বর-যাত্রীর দল আসবে। তার জন্যে আহালাদির উদ্‌যোগ করা চাই। পাড়ার লোকে কিছু কিছু সাহায্য করেছে। অভাব তরু যথেষ্ট।

পাড়ার প্রান্তে একটি বড়ো পুষ্করিণী। তার নাম পদ্মপুকুর। বর্তমান ভূস্বামী দুর্লভবাবুর পূর্বপুরুষদের আমলে এই পুষ্করিণী সর্বসাধারণে ব্যবহার করতে পেত।



এমন-কি, গ্রামের গৃহস্থবাড়ির কোনো অনুষ্ঠান উপলক্ষে প্রয়োজন উপস্থিত হ'লে, মাছ ধ'রে নেবার বাধা ছিল না। কিন্তু সম্প্রতি দুর্লভবাবু প্রজাদের সেই অধিকার বন্ধ ক'রে দিয়েছেন। অল্প কিছুদিন আগে খাজনা দিয়ে বন্দাবন জেলে তাঁর কাছ থেকে এই পুকুরে মাছ ধরবার স্বত্ত্ব পেয়েছে।

উদ্ধব এ সংবাদ ঠিকমত জানত না। তাই সেদিন রাত্রি থাকতে উঠে পদ্মপুকুর থেকে একটা বড়ো দেখে রুই মাছ ধ'রে বাড়ি আনবার উপক্রম করছে। এমন সময় বিষ ঘটল। সেদিন দুর্লভবাবুর ছোটো কন্ঠার অন্ন-প্রাশন। খুব সমারোহ ক'রে লোক খাওয়ানো হবে। তারি মাছ সংগ্রহের জন্য বাবুর কর্মচারী রুতিবাস কয়েকজন জেলে নিয়ে সেই পুষ্করিণীর ধারে এসে উপস্থিত।



দেখে, উদ্ধব এক মস্ত রুই মাছ ধরেছে। সেটা তখনি তার কাছ থেকে কেড়ে নিলে। উদ্ধব কৃতিবাসের হাতে পায়ে ধ'রে কাঁদতে লাগল। কোনো ফল হ'ল না।

ধনঞ্জয় পেয়াদা তাকে বলপূর্বক ধ'রে নিয়ে গেল ছল্ভবাবুর কাছে।

ছল্ভভের বিশ্বাস ছিল যে, ম্যাজিস্ট্রেটের কাছে অত্যাচারী ব'লে উদ্ধব তাঁর ছর্নাম করেছে। তাই তার উপরে তাঁর বিষম ক্রোধ। বললেন, “তুই মাছ চুরি

দ্বিতীয় ভাগ

করেছিস, তার দণ্ড দিতে হবে।”

ধনঞ্জয়কে বললেন, “একে ধরে নিয়ে যাও। যতক্ষণ না দশ টাকা দণ্ড আদায় হয়, ছেড়ে দিয়ো না।”

উদ্ধব হাত জোড় ক’রে বললে, “আমার দশ পয়সাও নেই। কাল কন্যার বিবাহ। কাজ শেষ হয়ে যাক, তার পরে আমাকে শাস্তি দেবেন।”

দুর্লভবাবু তার কাতর স্বাক্যে কর্ণপাত করলেন না।

ধনঞ্জয় উদ্ধবকে সকল লোকের সম্মুখে অপমান ক’রে ধ’রে নিয়ে গেল।

দুর্লভের পিসি কাত্যায়নী ঠাকরুন সেদিন অন্নপ্রাশনের নিমন্ত্রণে অন্তঃপুরে উপস্থিত ছিলেন। উদ্ধবের স্ত্রী মোক্ষদা তাঁর কাছে কেঁদে এসে পড়ল।

কাত্যায়নী দুর্লভকে ডেকে বললেন, “বাবা, নিষ্ঠুর হোয়ো না। উদ্ধবের কন্যার বিবাহে যদি অগ্নায় করো, তবে তোমার কন্যার অন্নপ্রাশনে অকল্যাণ হবে। উদ্ধবকে মুক্তি দাও।”

সহজ পাঠ

দুর্লভ পিসির অনুরোধ উপেক্ষা ক'রে চ'লে গেলেন।

কৃত্তিবাসকে ডেকে কাত্যায়নী বললেন, “উদ্ধবের দণ্ডের এই দশ টাকা দিলাম। এখনি তাকে ছেড়ে দাও।”

উদ্ধব ছাড়া পেলেন। কিন্তু অপমানে লজ্জায় তার দুই চক্ষু দিয়ে জল পড়তে লাগল।

পরদিন গোখুলি-লগ্নে নিস্তারিণীর বিবাহ। বেলা যখন চারটে তখন পাঁচজন বাহক উদ্ধবের কুটির-প্রাঙ্গণে এসে উপস্থিত। কেউ-বা এনেছে বুড়িতে মাছ, কেউ-বা এনেছে হাঁড়িতে দই, কারো হাতে থালায়-ভরা সন্দেশ, একজন এনেছে একখানি লাল চেলির শাড়ি।


পাড়ার লোকের আশ্চর্য লাগল। জিজ্ঞাসা করলে, “কে পাঠালেন?” বাহকেরা তার কোনো উত্তর না ক'রে চ'লে গেল। তার কিছুক্ষণ পরেই কুটিরের সম্মুখে এক পালুকি এসে দাঁড়ালো। তার মধ্যে থেকে নেমে এলেন কাত্যায়নী ঠাকরুন। উদ্ধব এত সৌভাগ্য স্বপ্নেও কল্পনা করতে পারত না। কাত্যায়নী বললেন, “দুর্লভ

দ্বিতীয় ভাগ

কাল তোমাকে অপমান করেছে, সে কথা তুমি মনে রেখো না। আমি তোমার কন্যাকে আশীর্বাদ ক'রে যাব, তাকে ডেকে দাও।”

কাত্যায়নী নিস্তারিণীকে একগাছি সোনার হার পরিয়ে দিলেন। আর, তার হাতে একশত টাকার একখানি নোট দিয়ে বললেন, “এই তোমার যৌতুক।”





অঞ্জনা-নদী-তীরে চন্দনী গাঁয়ে
পোড়ো মন্দিরখানা গঞ্জের বাঁয়ে
জীর্ণ ফাটল-ধরা— এক কোণে তারি
অন্ধ নিয়েছে বাসা কুঞ্জবিহারী ।
আত্মীয় কেহ নাই নিকট কি দূর,
আছে এক লেজ-কাটা ভক্ত কুকুর ।
আর আছে একতারা, বক্ষেতে ধ'রে
গুন্ গুন্ গান গায় গুঞ্জন-স্বরে ।
গঞ্জের জমিদার সঞ্জয় সেন
ছ-মুঠো অন্ন তারে ছই বেলা দেন ।

দ্বিতীয় ভাগ

সাতকড়ি ভঞ্জে মস্ত দালান,
কুঞ্জ সেখানে করে প্রত্যাশে গান ।
“হরি হরি” রব উঠে অঙ্গন-মাঝে,
বান্‌বানি বান্‌বানি খঞ্জনি বাজে ।
ভঞ্জে পিসি তাই সন্তোষ পান,
কুঞ্জকে করেছেন কস্থল দান ।
চিঁড়ে-মুড়কিতে তার ভরি দেন ঝুলি,
পৌষে খাওয়ান ডেকে মিঠে পিঠে-পুলি ।
আশ্বিনে হাট বসে ভারি ধুম ক’রে,
মহাজনী নৌকায় ঘাট যায় ভ’রে ;
হাঁকাহাঁকি ঠেলাঠেলি, মহা সোরগোল,
পশ্চিমী মাল্লারা বাজায় মাদোল ।
বোঝা নিয়ে মস্তুর চলে গোরুগাড়ি,
চাকাগুলো ক্রন্দন করে ডাক ছাড়ি ।
কল্লোলে কোলাহলে জাগে এক ধ্বনি—
অন্ধের কণ্ঠের গান আগমনী ।

সহজ পাঠ

সেই গান মিলে যায় দূর হতে দূরে,
শরতের আকাশেতে সোনা রোদুদরে ॥

